

# RIPOTI A LE PERESITENE

Tausaga Aoga: 2017—2018

*“Le Alii e, ua atoa le po ua tigaina ai i matou, e leai ni mea ua maua; a ona o lau fetalaiga ou te tuu ifo ai le upega” – (Luka 5:5)*

**“O Iai a le Faatoetoemuliola mo le Taliuta”**

Moreli J. T. Niutoa

Iulai 7, 2018

# RIPOTI A LE PERESITENE

*Tausaga Aoga: 2017–2018*

Talofa lava!

O le a taoto ia i faasouga o ao le paia maualuga ua afifio i le Laumua o le Ekalesia Faapotopotoga Kerisiano i Amerika Samoa (EFKAS). Ou te faapoipoi lili’a nei ou ‘apoina le pua nai aganoa ona fai lea ma lape o le auauna faatauva. E ta matalafi foi le agai ae atu i le tuāfale auā ua mamalu le tauaofiaga o lenei taeao ma le aso.

Ou te manatua ai upu a le tama Eperu o le ‘aao tusitusi a le Faataoto, “*O le faamoemoe ua taunuu o le la’au o le ola lea*” (Faataoto 13:12). Ona ou manatua foi lea o upu e fai i le itulagi i sasa’e, a laasia le maota paepaevalu o le Tuimanu’a ia faatulou. Tulou, tulouna lava.

E faatalofa atu i le eeta’i o le Ekalesia. Paia i le Lauaufono, Komiti a le Au Toeaina, faapea le mamalu o Komiti Tumau a le Ekalesia. Mamalu mai o le aufaigaluega i Faifeau ma Faletua, A’oa’o, Tiakono ma outou faletua. Talofa.

Ua maualuga foi lenei aso i le afifio mai o le atunuu. Le paia i le Manu’atele, Faleagafulu, faapea le usoga ia Tumua ma Pule. O tupu ma ee ma failauga ua tofia i maota, laoa, ma malaefono o afioaga ma itumalo, mālō le soifua manuia. O le paia o mātua ma aiga ua mafuta mai i lenei aso, talofa, talofa lava. Se ua moni lava upu, o le faamoemoe ua taunuu lea ua tini pa’ō le uto e pei o upu i le faiva o vai; ua soo’ula le fala ua soo fo’i le matālalaga o paia ua afifio mai. Faafetai laia i le Atua Mamana! O le Tagaloa Pule ma le Faafotutupu o mea sili.

O se taimi tatou te taumavae, ia fo’i le manu ma si ana i’a. Pe a tuuama le fua ma ta’ape le fili a alii, ia faamamalu mai le Atua. Ia manuia le Ekalesia Aoao.

Soifua.

Moreli J. Niutoa

## O le Vasega Faai'uaso, 2018

E to'asefulutolu (13) le Vasega Faai'uaso o lenei Tausaga Aoga 2017–2018: 1 Faifeau, 8 A'oa'o o le Bachelor of Divinity, e to'afa (4) Faletua o le Polokalama a le Certificate of Theological Study (CTS). Ina ia agavaa le Faletua mo lea Faailoga o le CTS, e tataua ona aoga mo le lua (2) tausaga ma 'auai i vasega ma vaega uma o le polokalama mo le fa (4) tausaga.

O le fa (4) tausaga ua aumai e tapena ma sauni ai le aufaigaluega—A'oa'o ma Faletua—o se taimi ua talafeagai lelei ma o tatou vaitaimi pe a fuafua i gasologa o le olaga ma suiga ua i ai. O le faamoemoe o a'oa'oga i potu aoga ia a'oa'oina le aufaigaluega ia malamalama, maua agavaa ma metotia e atamamai ai i tapenaga o lotu ma sauniga faatulagaina a le EFKAS (pei ona iai i le Faavae); fausaga ma gagana o Lauga, metotia ma ala e su'esu'e ai i le Tusi Paia (*biblical studies*), ia iloa le talafaasolopito o le ekalesia (*church history*), a'oa'oga faatuatua (*religious education*), iloiloa faa-mataupu silisili (*theological studies*), galuega faa-faifeau (*ministry*), a'oa'oga faufautua (*counseling*), su'esu'ega faalemafaufau (*psychology*), ma mau o le talitonuga ma le faatuatua o le EFKAS (*CCCAS church polity*). O mataupu uma ia o loo feagai ma alii Faiaoga ia latou tapenaga i potu aoga.

O vaega faapitoa ia o le iloiloa po o ua pasia ma agavaa A'oa'o ma Faletua iā latou polokalama o a'oa'oina ai: suega faavaitau (*mid-terms, finals*), pepa (*academic papers and thesis*), tusitusiga i ulutala filifilia (*essays*), atoa ai ma le finafinau i totonu o vasega (*participation*). O le soifua faaleagaga: faigalotu (*worship services, liturgy*), lauga (*preaching*), soifua faa-ta'ita'i (*leadership skills*), to'aga/faamaoni i vasega, lotu, galuega, 'au aiga, ma mafutaga a le Kolisi (*campus life and activities*), isi na o vaega tāua o iloiloa a alii Faiaoga e iloa ai le faigaluega ua agavaa mo le Faauuga. A mae'a le iloiloa ma le faaiuga a alii Faiaoga ma le Peresitene ona tuuina atu lea o latou suafa i le Komiti Faafoe mo latou uma ua agavaa mo le Faauuga, ma ala atu ai i le Komiti Au Toeaina mo sa latou fautuaga ma le faamaoniga.

O suafa nei o le Faifeau, A'oa'o, ma Faletua ua faauuina i lenei Tausaga Aoga 2017-2018 mai ia latou polokalama na a'oa'oina ai mo le fa (4) tausaga:

| Suafa                   | Polokalama                       | Matagaluega                     |
|-------------------------|----------------------------------|---------------------------------|
| <b>Faifeau / A'oa'o</b> |                                  |                                 |
| Rev. Kautoa Molotii     | Bachelor of Divinity             | Ekalesia Kelisiano Tuvalu (EKT) |
| Iese Faavaoga           | Bachelor of Divinity             | Niu Sila & Ausetalia            |
| Vili Polikapo           | Bachelor of Divinity             | Sasa'e (Amouli)                 |
| Felise Augafa           | Bachelor of Divinity             | Kalefonia i Matu (Oakland)      |
| Eteuati Semaia          | Bachelor of Divinity             | Sasa'e (Aunuu)                  |
| Etele Falealii          | Bachelor of Divinity             | Tutotonu (Matuu)                |
| Faamanu Fogavai         | Bachelor of Divinity             | Tutotonu (Talalelei)            |
| Solomona Taliulu        | Bachelor of Divinity             | Kalefonia i Saute (Arizona)     |
| Lafita Lafita, Jr.      | Bachelor of Divinity             | Ekalesia Kelisiano Tuvalu (EKT) |
| Doris Faavaoga          | Certificate of Theological Study | Niu Sila & Ausetalia            |
| Bauhinea Polikapo       | Certificate of Theological Study | Sasa'e (Amouli)                 |
| Avataeo Augafa          | Certificate of Theological Study | Kalefonia i Matu (Oakland)      |
| Tauolaga Semaia         | Certificate of Theological Study | Sasa'e (Aunuu)                  |
| Repeka Falealii         | In absentia                      | Tutotonu (Matuu & Faganeanea)   |

Ia manuia tele le Vasega Faai'uaso, 2018. Manuia ekalesia, matua ma aiga na tapua'ia outou faiva.

## Taulu'ilu'i o A'oa'oga Faa-Mataupu Silisili o le 21 Seneturi

---

Ina ia silafia e le Ekalesia le tulaga ma gasologa o i ai a'oa'oga ma le faatautaiga o mataupu ma suiga o taualumaga a lau Kolisi Faafaifeau. Ua le o toe po malaê i le tele o suiga ma taulu'ilu'i (*challenges*) o a'oa'oga fou ua oo i ai le lalolagi. O le upu moni, o faamanuiaga a le Atua ua tatou maua ma e tataua ona toe iloilo ma fetuuna'i ina ia talafeagai mo tatou lava vaitau faapea le galuega a le Ekalesia.

O le faataotoga leni o le Ta'iala Fou a lau Kolisi Faafaifeau i Kanana Fou. O nisi la nei o mau ua mulimulita'i i ai le suiga; mau na e 30 ua faapuupuu atu mo lou silafia. Ua saunia ona o le naunau ia manuia a'oa'oga a le Ekalesia ma ia toe mamānu se alāfua fou e ta'iala ai a'oa'oga a le aufaigaluega—A'oa'o ma Faletua—o saunia i totonu o le Laumua, ia talafeagai mo leni vaitau, Seneturi 21.

### I. Mana'omia se Ta'iala Agatonu (*Need a Direct Curriculum*)

- E iai lona manaoga faapitoa mo le tulaga o faatino ai a'oa'oga a le Ekalesia Faapotopotoga Kerisiano i Amerika Samoa

### II. Amata i le Mana'o o le Tagata o A'oa'oina (*Start with the Need of the Learner*)

- E tataua ona fausia le Ta'iala mai le iunite amata o le mana'o o le ua a'oa'oina, e ui o loo iai le atoaga (*content*) ma tulu'iga (*boundaries*) o mataupu ua a'oa'oina (*existing subjects*).

### III. Taulu'ilu'i o Fausaga Faaleagaga (*Challenges of Spiritual Formation*)

- Tōfā Manino: O ifea o lafo iai le faamamafa i taimi o a'oa'oina ai? O lafo ea i le saunia o le a'oa'oina faalemafaufau po o le atiga o le faaleagaga ma le amio Kerisiano? Po o mea uma ia e lua?

### IV. Soifua Matua Faaleagaga (*Spiritual Maturity*)

- Ia tūa i Kolisi Faafaifeau le “matua faaleagaga” o fanau aoga; ola Kerisiano.
- To'atele o loo tamaninii pea le ola faaleagaga.
- Ua tataua i Kolisi Faafaifeau ona aofia ia latou polokalama faalemafaufau vasega ma agavaa ina ia faamalosi ma faalautele ai le soifua faaleagaga o fanau.

### V. Faamalosi ma Faafaileina o le Soifua Matua Faaleagaga (*Empowering of Spiritual Maturity*)

- A'oa'oina i le Tusi Paia (*Bible Study*)
- A'oa'oina ia masani i le ola Kerisiano
- A'oa'oga e faatino ma faafailele ai le faaleagaga—faata'ita'iga: galuega faamasani, 'au aiga, faigalotu, tatalo, aoga Aso Sa, etc.); o le soifua tatalo
- O le loto onosa'i (galuega, mea aoga, taaloga, ma isi); le taasisiga o le vāfealoaloa'i ma isi, ma le Atua

E iai isi o le aufaigaluega ua faauu atu i Kolisi Faafaifeau ma ua tausi aulotu ae le i lava ona ausia le laasaga o le matua faaleagaga e avea ai ma faifeau a Iesu Keriso. O le isi lea o mafuaaga o le toe iloilo o le Ta'iala a lau Kolisi, ina ua atoa le lima (5) tausaga e pei ona faatulagaina ai, ina ia fesoasoani i le faafailelega atili o le ola faaleagaga o A'oa'o ma Faletua i totonu o lau Kolisi.

Talu ai o le tagata e iai ona manaoga, e moomia se fesoasoani e ta'ita'itonu ai lona ola ma ana matāfaioi ua tuuina i ai, o le faamalosi 'au faaleagaga e tele ona foliga. Pe a e silasila i le itulau e valu (8) o leni ripoti o loo iai faiga lotu ua tuu faatasia mo lea vaega o le Ta'iala.

**VI. A’oa’oina o Tagata Faigaluega a le Ekalesia (*Training of Church Workers*)**

- Ua tatau ma onomea i Kolisi Faafaifeau ona taliaina ma a’oa’o tagata lotu ua lagona le valaauina e galulue mo le ekalesia e ese mai ia i latou ua faauuina e avea ma faifeau ma faletua i le galuega.
- Pe a mae’a ona a’oa’oina i mataupu, o latou nei e aoga i totonu o aulotu e lagolago ma fesoasoani i le afaigaluega faifeau ma faletua.
- E latou te aumaia se ata manino o gasologa o le galuega i aulotu (*realities*) i nuu mo Aoga Faafaifeau, e talanoaina ma soālaupule auā le silafia ma su’esu’ega a alii Faiaoga.
- Ia fa’aaogaina le polokalama i le afiafi (CTS) o loo faia lea i le Laumua.

O le āfuaga lea ua fautuaina ai pea le afaigaluega aemaise lava i A’oa’o Fesoasoani (AF) ma soo se tasi e fia ‘auai i vasega o loo faia i totonu o le Laumua. Ua faia ia vasega i le 6:00 pm i le afiafi.

**VII. O le Misiona i Nuū Tu Taulaga / Tutotonu (*Urban Missions*)**

- Tele Aoga Faafaifeau ua taula’i ana tapenaga ma a’oa’oga mo le misiona i aulotu i nuu tu i le taulaga; ua tatau ona toe fetuuna’i auā o le taulaga ua “ioimata” i ai tagata mai fafo e asiasi mai.
- O le misiona i aulotu i taulaga ia tatau ona avea ma vaega o le Ta’iala – o iina e faigata le olaga, e tele le pisi o tagata, ua tuto’atasi le to’atele ma momotu ese ma aiga o alala i nuu i tuā.
- Ua tumutumu tagata ma nonofo mamao ese ma le lautele; e le fafia i le to’atele ma le olaga pisi.

**VIII. Soo se Ta’iala e Tatau ona Aoga ma Fesoota’i ma le Mana’o (*Curriculum must Meet the Need*)**

- Ia faatāua vasega ma a’oa’oga ia fesoota’i ma le mana’o o aulotu ma ua tatau ona faamuamua.
- E tatau ona toe iloilo ma paepae lelei vasega ta’itasi ma lona tāua i le galuega a le Ekalesia.
- A o le i faaulufaleina se mataupu fou e tatau lava ona fetuuna’i lelei mo lona tāua e faia ai.

**IX. Vasega Fou e Tatau ona Aofia ai (*Courses Included*)**

- Mataupu silisili o Atina’ega (*Theology of Development*)
- Mataupu mo Fautuaga Faalemafaufau (*Counseling*)
- Iloiloga ma le mataituina o mea e tutupu (*Conflict Management*)
- Fealofaniga ma le Faaleleiga (*Peace and Reconciliation*)
- Faavae ma Iugafono (*Constitution and Church Polity*)
- Misiona ma le Galuega Faamisionare (*Evangelism*)
- Galuega fesoasoani mo e matitiva (*Ministry to the Poor*)
- Galuega fesoasoani mo e mama’i—faata’ita’iga: fatu, suka, toto maualuga, ma isi (*Ministry to the Sick*)

**X. Su’esu’ega Tāua (*Relevant Studies*)**

O le Kolisi Faafaifeau i Kanana Fou ma le EFKAS e tatau ona galulue faatasi, tausoa ma vaavaalua ina ia atia’e le mana’o o aulotu. Ua tatau foi i A’oa’o ma Faletua (ma soo se tasi) ona faia a latou su’esu’ega ma tatusiga i mataupu ua talafeagai mo le faaleleia atili o le faatuatuaga o le Ekalesia Aoao.

**XI. Taulu’ilu’i o le Avea ma Kolisi Faafaifeau (*Challenges of Becoming a Theological College*)**

1. O Kanana Fou ia tumau pea o se aoga Kerisiano; lana Mataupu Silisili (*department*) ia avea ma lotoivai e ogātotonu iai mataupu uma o a’oa’oina i le Laumua.
2. Filifiliga o faiaoga ma o latou agavaa ia talafeagai ma mataupu o a’oa’oina; e le o tagata uma e i’u mai ma faailoga taualoa e avea ma faiaoga i se Kolisi Faafaifeau.
3. O le faatupeina o polokalama, a’oa’oga faaauau mo faiaoga ma tagata faigaluega, ma le avea ai o mataupu o a’oa’oina o ni mataupu ua taualoaina ma mulimulita’i i ta’iala ma poloaiga ua tuuina mai e se faauluuluga (*accrediting body*).

**XII. Tau o le A'oa'oina (Cost of Education)**

1. Ua taugata a'oa'oga faa-mataupu silisili ma ua taugata ai foi ma pili a fanau aoga.
2. O nisi o fanau aoga o tauaasoasoa aiga.
3. O su'esu'ega i fafo atu o le Laumua e tãua tele mo le a'oa'oina o fanau i gasologa o iai le lalolagi ma le Ekalesia, ma e mana'omia ai le tupe; e tataua ona fuafua lelei se vaegātupe mo lea faamoemoe, aemaise lava o su'esu'ega i fafo atu o le atunuu.
4. O le tausaga e tasi ua faamaumau mo le galuega faamasani (*in-ministry or internship*) o se vaega tãua lea o le a'oa'oina pe afai e iai se tupe e faatupe ai—e.g. malaga atu i aulotu i fafo mo sailiiliga, etc.
5. Mana'omia le iai o sina vaegatupe faaleoleo ma faapolopolo mo le faatinoga o mataupu a le Kolisi.

**XIII. Aoga Nofotumau ma Aoga mo Nofoga Mamao (Residential and Distance Education)**

1. O le aoga faafaifeau o iai lona malosiaga i upegatafa'ilagi e mulimulita'i i faiga faa-onaponei, ua ta'u lena o le "faiga" a Aoga Nofotumau (*residential education*).
2. O aoga mo nofoaga mamao, ua avea ai le faiaoga ma faletusi ma le faasoa o alagã'oa faalemafaufau ma punã'oa e ala atu i upegatafa'ilagi. Nisi o fanau aoga e faigata ona malamalama i lea ituaiga faiga e mana'omia le nofotumau.

**XIV. Vaivaiga o Faiga Na Sau Ai (The Drawback of Traditional System)**

- O le vaivaiga tele o le faiga na sau a'i aoga ua na tamauina a'oa'oga faa-mataupu silisili i tagata to'aititi ua filifilia, aemaise lava o taimi faapenei o loo mana'omia e le ekalesia se aufaigaluega agavaa latou te faaauauina le galuega tala'i. Ia matala pea a'oa'oga i soo se tasi o le Ekalesia.

**XV. A'oa'oga mo Nofoga Mamao (Distance Education)**

- O le a'oa'oina o vasega o faia i potu aoga mai se isi nofoaga e ese atu ma le nofoaga o iai le tagata o a'oa'oina, e ala lea i vasega ua mae'a ona pu'eina i masini po o nisi faiga tusitusia ua uma ona saunia.
- Ua faatuina a'oa'oga mo nofoaga mamao ina ia fesoasoani i le alualu o a'oa'oga o mana'omia e tagata lotu, ae le o mafai ona faia i tulaga o a'oa'oga e pei ona sau a'i (*traditional education—classrooms*).
- O le tãua o lenei faiga ina ia a'oa'oina tagata uma o le ekalesia i lona faatuatuaga, ma iloa mea o tutupu ma taualumaga a le Ekalesia Aoao. O se ekalesia e maopoopo le a'oa'oina o ona tagata lotu, e sili atu ona mausali ma faamoemoeina le faatinoga o le galuega.

**XVI. A'oa'oga Faa-Fetusia'iga (Correspondence Studies)**

- O lea faiga ua na fa'aaogaina meaaoga ua mae'a ona tusia ma lolomi ae mafai ona fesoasoani i ai ma laau pu'eleo, ata ua mae'a ona pu'e, fa'aaogaina o komepiuta ma isi lava.
- Ua ta'ua lea faiga o le *Virtual College*; po o a'oa'oga ua saunia i ala o fesoota'iga faatekonolosi.

**XVII. Maimoaga ia Kanana Fou i Upegatafa'ilagi (Kanana Fou Virtual College)**

- E le o iai se faiga faapea a le Kolisi i le taimi nei. A o loo iai i le faamoemoe e ala i le fa'aaogaina o komepiuta ma fesoota'iga faaonaponei ina ia faalautele ai le mauagofie o a'oa'oga e tagata Samoa o mamao ma lana Kolisi Faafaifeau, po o latou o fia faalautele le iloa ae le o mafai ona 'auai i vasega i totonu o potu aoga.

**XVIII. A'oa'oina Tatala (Open Learning)**

- O le "a'oa'oina tatala" ua faatatau i le tatalaina atu lea o avanoa tau a'oa'oga i le lautele e mafai ai ona a'oa'oina ma tapena lelei tagata uma o le Ekalesia ina ia latou iloa atili.

- Ia mafai e tagata uma ona a’oa’oina i soo se taimi, nofoaga ma le laolao e faamalieina ai tuutuuuga ma mea o mana’omia.

#### **XIX. Upegatafa’ilagi ma Imeli (*Internet and Email*)**

- Ua tele ala ua faafouina ma ua toe faatulagaina ai e le upegatafa’ilagi a’oa’oga mauualuluga
- Ua fesoasoani lea mo le tagata aoga e a’oa’oina lava i lona aiga ma faatatau i ona mana’oga.
- Ua avea nei le faiaoga ma tagata faaliliu (*interpreter*), ta’iala ma lē na te faatupuina.

#### **XX. Mana’omia e le EFKAS ni Kerisiano ua A’oa’oina (*CCCAS Need Trained Christians*)**

- E ese le faauu, ese le a’oa’oina. A faauu, lona uiga ua iai le faailoga taualoa e iloa ai ua mae’a se taumafaiga; a’oa’oina, ua amio ma ola ai. O le taumafai lea o a’oa’oga faa-mataupu silisili e suitulaga polokalama ua fai faatatau mo aoga nofo tumau; ia faateleina tagata ulufale ma le aofa’i o latou ua faauuina i tausaga ta’itasi. Ia paleni le numera “ulufale” (*entering-students*) ma le “ulufafo” (*exiting-graduates*).
- Kerisiano ua a’oa’oina, tama/tama’ita’i aoga ua na iloa mataupu ma faaliliu ina ia talafeagai ma le olaga o soifua ai, ia iloa ona fetuuna’i a’oa’oga ua le toe talafeagai mo aso nei.
- Ua malamalama ma manino i suiga o le olaga—atunuu, mālō, ekalesia, ma tagata.
- Na te “vaeaetonuina” le Upu—lauga, a’oa’o atu, ola ma tausisi i ai—i aso uma.

#### **XXI. Talilumāfalega o le Mataupu Silisili (*Contextualization of Theology*)**

Nisi o mea o tutupu e ao ona taula’i i ai le fauina o se Ta’iala:

1. Mafatiaga ma puapuaga o iai le olaga i Samoa ma le lalolagi
2. Aiga o tagata e le faigaluega
3. Mativa ma utiuti le faasoa
4. Amioletonu i totonu o le faigāmālō / atunuu
5. Faama’i eseese ma le mātuiā

#### **XXII. Mataupu Silisili Faa-Samoa (*Critical Faa-Samoan Theology*)**

- O le fesili tāua e faapea—“Le a se faiga e sili atu ona lelei e fa’aali ma faatino ai le talalelei i Samoa nei?” O a ni ata valivali ma faaupuga e faamatalatala ai le mataupu silisili ia nanamu ma foliga Samoa?
- E tatau i le Ta’iala ona malamalama i le mataupu silisili Faa-Samoa.
- Faatinoga o le polokalama o a’oa’oina e tatau ona atagia ai le lē faailoga tagata, tu faa-anamua, taotaomia, le amiotonu, utiuti le faasoa, ma isi lava.

#### **XXIII. Metotia Faa-Mataupu Silisili a le Itulagi i Sisifo o le Lalolagi (*Western Theological Models*)**

- A’oa’oina o le mataupu silisili i Samoa ua atagia ai pea mafaufauga ma metotia a latou mai le itulagi i sisifo o le kelope—Europa, Siamani, Asia, Falani, atoa ai foi ma Amerika, ma isi. O le faafitauli tele i le vā o faaliliuga (*hermeneutics*) – le avanoa i le vā o “talitonuga sa’o” (*orthodoxy*) ma le “faatinoga sa’o” (*orthopraxis*) atoa ai ma le faafitauli i le tuufaatasia o talitonuga i se taofiga faa-tagata Samoa.

#### **XXIV. Toe Lalāga Polokalama mo le Ta’iala (*ReWrite Curricula*)**

- Ia toe fetuuna’i ma lalaga le ta’iala, toe iloilo a tatou metotia faa-mataupu silisili ma le faiga o a’oa’oina ai le mataupu silisili i Samoa o se faiva ua mana’omia tele. E tau leai se loto mafanafana ua tatou maua mai i le atamai faalemafaufau e uiga ia tatou talitonuga pe afai e le mafai ona atagia lena atamai iā tatou sauniga lotu, amio ma le faatuatua, ma le tatou olaga i aso uma.

**XXV. Ta'iala ua na Su'esu'eina le Mafuaaga** (*A Curriculum that Explores the Causes*)

- Ia āfua atu le ta'iala i le su'esu'ega o mafuaaga o tiga ma mafatiaga i olaga o tatou tagata ma saili po o le a se mea ua na aumaia le atoatoa o le ola mo tagata i le ogātotonu o nei manu'aga ma tiga.
- E tatau ona mafaufau loloto i “a'oa'oga mo e o puapuagatia” (*pedagogy of the oppressed*) ma le “a'oa'oina o le mafaufau fetuuna'i” (*education for critical consciousness*).

**XXVI. Mataupu Silisili Faa-Faifeau** (*Pastoral Theology*)

Ina ua iloa ma molimau i le tulaga faaletonu o iai le to'atele o aiga o aso nei i Samoa, e tatau lava ona siitia le maua luga o le mataupu silisili faa-faifeau. Ia faavae se ta'iala faa-mataupu silisili e fesoasoani i faaletonu ma to'atuga o feagai ma tagata lotu:

- Fanau tama'ita'i ua ma'itaga ona o le ola lepopoi o tagata amio leaga
- Matua tasi (*one-parent*)—aiga e leai se tamā na o le tinā / poo le tamā foi ae leai se tinā
- Olaga agasala faifai pea; amioleaga ma le faita'aga
- Tupulaga ola faatautala i fanau laiti; le usita'i i matua ma e matutua

**XXVII. Nisi o Vaega e Mana'omia ona Auiliili** (*Other Areas that Need Attention*)

- Vāfeagai ai o le ekalesia ma le mālō
- Autalavou ma e ua matutua
- O ta'ita'i ma latou o mulimuli
- O e ua a'oa'oina ma latou e leai
- Tapu 'ele'ele, tapu a aiga, ma isi sa
- Sauāina i totonu o aiga
- O āiā tatau a fafine ma tamaiti

**XXVIII. O isi Vaega e Mana'omia ona Toe Silasila i ai**

- Mafutaga aotelega a le au faatuatua (*Ecumenism*)
- Tulaga ma gaoioiga a le itupa o fafine/tama'ita'i
- Tele o lotu eseese ua fetuleni mai ma tagata ese e pei o Fiti, Filipaina, Saina, Initia, ma isi faatuatuga e pei o Musalemi, Buddah, ma le tele lava.
- A'oa'oga e faafailele ai le nonofo filemu, faaleleiga, amiotonu, faato'ilaloina o le sauāina, ma isi lava.
- Aiā tatau

**XXIX. Faama'i o le Fatu, Faamamāina o le Toto, Suka, Dengue Fever, ma isi Taulu'ilu'i** (*Diseases of the Heart, Dialysis, Diabetes, Dengue Fever, and other Challenges*)

- Ia fausia se mataupu silisili e fesoasoani i le taliina o le fesili tāua e faatatau i le tatou toilalo pea i mea sese; se mataupu silisili e fesoasoani i fanau, talavou, fafine ma tamāloloa o aulotu ma magāala e faaosofia ai se talanoaga e taula'i i faatinoga ma amioga “faufauola” i le ogātotonu o le ola puapuagatia, faigata ma le oti.

**XXX. O le Apili** (*Appeal*)

- Ia faatāua a tatou Ta'iala. O mea e le tāua e le tatau ona maumau i ai le taimi.
- Soo se ta'iala e tatau lava ona toe iloilo i taimi faatulagaina (5 tausaga, 7 tausaga, etc.) po o mafai lava ona tali atu i mana'oga o fanau aoga, le ekalesia ma le atunuu o tatou auauna i ai.

## Suiga i Alāfua o Ta'iala mo Matāupu o le Porokalama BD, 2017—

O soo se Kolisi Faafaifeau, e finau mo se manuia e aafia ai suiga fou. E vaavaai pea i luma ma tuli se 'ai mo le manuia o le Ekalesia Aoao. O suiga lelei ma talafeagai e tapena ai fanau o le lumana'i ua ofoina atu lo latou soifua mo le galuega Tala'i. O le ioimata o soo se Ekalesia o lana Kolisi Faafaifeau. O le faiva tupito o soo se Kolisi Faafaifeau, o le saunia o le afaigaluega ia lava tãoso—atamai faalemafaufau ma le loto ia soifua mālōlōina—inā ia saunia lelei mo le tofiga o le **Faifeau Samoa (FS)** ma le **Faletua**.

### 1. Alāfua o le Ta'iala Fou – (Curriculum)

O le tausaga lenei ua atoa i ai le lima (5) tausaga talu ona tuu le *Diploma of Theology* ae amata sa'o i le tikeri (*degree*) o le **Bachelor of Divinity (BD)**. O lea ua iai le fetuuna'iga i nisi o mataupu ma lona faatinoga ina ia aofia uma ai sauniga lotu o loo faia pea i le Kolisi (silasila i le itulau 4). Ua fautuaina pea e le Komisi o loo faamalumalu ai mataupu ma polokalama a Kanana Fou, le **South Pacific Association of Theological Schools (SPATS)**, ina ia aofia faiga lotu uma a le Kolisi i le faitau aofa'i o togi (*credits*) e faauu ai. O le suiga lena ma ona aiaiga na galulue ai susuga i le Sui Peresitene ma alii faiaoga i le tau mafanafana, masina o Iuni, Iulai, ma Aukuso o le tausaga ua tuana'i, 2017.

O le masina o Setema 2017 na amata ai loa le alāfua o le ta'iala fou o iai nei, pei ona fautuaina e le Komisi a le SPATS, mo le faailoga o le Bachelor of Divinity. Ua uma ona aloa'ia e le Komisi le suiga lea i lana asiasiga ia Aperila 2016. Lea faato'a faatino i le Tausaga Aoga 2017-18 le faamoemoe lea ina atoa iai le lima tausaga talu ona amata sa'o i le BD. O le faamoemoe ma le faatulagaga mai le tausaga e 2012 ia tuuvaavaaia ma mātaitū lelei lenei suiga fou ina ia toe iloilo pe a mae'a le lima tausaga (2012-2017). Na iai le talitonuga o le lima tausaga o se avanoa lea e mātā'i ai le suiga fou lea pe faapefea—o a ni vaega o vaivai ai e mana'omia ona toe faalelei, o a foi vaega o loo lelei ma toe faamalositia ina ia lelei atili.

O le suiga fou lea ua iai ua tuu le avanoa i le Tausaga 3 ma le 4 e filifili ai e latou vasega e talafeagai ma latou faamamafa (*electives*). Lona uiga, ua faamoemoe faiaoga o le 3 ma le 4 i vasega ua latou filifilia e fua ia latou faamamafa. O le faiga lea ua aofia uma ai Faiaoga ma maua o latou avanoa e faiaoga ai mo A'oa'o ma Faletua uma. O loo iai foi le polokalama a Faletua, o le suiga fou lava lea na amata i le tausaga 2017, o le **Certificate of Theological Study (CTS)**. O le polokalama lea o le CTS o loo ave i le afiafi i totonu o le Laumua mo latou o fia faalautele le iloa i le Tusi Paia. Ua matou molimauina lenei suiga o se faiga talafeagai mo le afaigaluega o A'oa'o ma Faletua ina ia avanoa taimi mo latou saililiga ma meaaga. Ua talafeagai foi lenei suiga mo alii Faiaoga ina ua lava le taimi e su'esu'e ma tapena ai mo a latou vasega. Ina ia e silafia, e le na o vasega o feagai ma alii Faiaoga, ua faaavanoaina foi afiafi mo lona Au Aiga e fesoasoani ai i A'oa'o ma Faletua ia latou meaaga ma nisi o manaoga o fia maua ai se fesoasoani a Faiaoga ma o latou Faletua.

#### a) Kalena Fou o Mataupu, Setema 2017—

|               | Aso Gafua           | Aso Lua             | Aso Lulu            | Aso Tofi            | Aso Faraile         |
|---------------|---------------------|---------------------|---------------------|---------------------|---------------------|
| 5:30 am       | Lotu Tatalo Taeao   | LTT                 | LTT                 | LTT                 | LTT                 |
| 6:00 am       | Faamamā le 'aai     | Faamamā le 'aai     | Faamamā le 'aai     | Faamamā le 'aai     | Faamamā le 'aai     |
| 7:45 am       | Lotu Taeao          | Lotu Taeao          | Lotu Taeao          | Vasega Lauga        | Outing              |
| 8:30–11:30 am | Vasega Taeao        | Vasega Taeao        | Vasega Taeao        | Vasega Lauga        |                     |
| 1:00–4:00 pm  | Vasega Aoauli       | Vasega Aoauli       | Galuega Au Aiga     | Taaloga             |                     |
| 6:00–6:20 pm  | Lotu Afiafi / Sa    | Lotu Afiafi / Sa    | Mafutaga Au Aiga    | Lotu Afiafi / Sa    | Lotu Afiafi / Sa    |
| 8:00–10:00 pm | Mandatory Study     | Mandatory Study     |                     | Mandatory Study     |                     |
| 11:00 pm      | Sa / Malologa       | Sa / Malologa       | Sa / Malologa       | Sa / Malologa       | Sa / Malologa       |
| 6:00 am       | Tatala Pa o le 'Aai | Tatala Pa o le 'Aai | Tatala Pa o le 'Aai | Tatala Pa o le 'Aai | Tatala Pa o le 'Aai |

E tolu aso o vasega (*Mon/Tue/Wed*), ma le Vasega Lauga i le Aso Tofi. E ta'i lima (5) vasega ua resitala ai A'oa'o; 3 *credits* i le vasega (15 *credits per semesters*; 30 *credits per school year*; 120 *for 4 years*). O le faiga na sau ai i tausaga e tele ua mavae, e tasi le vasega ae vaevae lona a'oa'oina (*teaching*) i aso e lua pe tolu o le vaiaso. Le suiga lea ua iai e tasi le aso e a'oa'o ai le vasega (3 itula o le vasega). Ua fesoasoani lea i alii Faiaoga ia latou tapenaga. O faatulagaga laia ia o faatasi ma le ta'iala o fautua mai ai le faamalumaluga (*accrediting body*, SPATS). E ui i nei suiga, o loo faatumauiina pea le atoa o vasega ta'ilima (5) a le A'oa'o i le tausaga aoga (*semester*); ta'ilua (2) vasega a faletua (*semester*).

## 2. Faaopoopoga i le Ta'iala

O nisi fo'i nei o faaopoopoga ma suiga ua tuuina i le **Alāfua** o le **Ta'iala** mo vasega a A'oa'o ma Faletua. E pei ona ou ta'ua muamua, e tāua le a'oa'oina o A'oa'o ma Faletua uma ia mautu le ola faaleagaga. O le talitonuga, a paleni le soifua faaleagaga ma le atamai faalemafaufau ona manino lea i soo se faigaluega lona valaauina e le Atua. Pe a le paleni, ona patupatu itutasi lea o le ola o le faigaluega ma le manino foi i lona valaauina; ua faafoliga. Ua silasila le SPATS i le tele o mataupu ma mea o fai i le Kolisi ua aofia i lana Ta'iala Tuai. O le fautuaga a le SPATS, e tataua ona aofia "lotu" uma ia i totonu o le Ta'iala o le BD, ae le na o se vaega o le olaga faaleagaga i totonu o le Kolisi, e pei o taualumaga ia:

1. **Lotu Talosia o le Vaveao** – 5:00 am (Aso Gafua e oo i le Aso Toona'i)
2. **Lotu Taeao** (*Morning Devotion*) – 7:45 am (Aso Gafua e oo i le Aso Tofi)
3. **Lotu Afiāfi i Aiga** – 6:00 pm (Aso Sa, Gafua, Lua, Tofi, Faraile, To'ona'i)
4. **Lotu Afiāfi A'oa'o ma Faletua** (*Vespers*) – 6:30 pm (Chapel: Aso Gafua, Lua, Faraile)
5. **Lotu Aso Lulu** – Laumua, 7:45 am (*Chapel*)
6. **Lotu Tatalo a Faletua o Faiaoga ma A'oa'o** – 6:00 am (Aso To'ana'i)
7. **Lotu Aso Lua Faletua** – 6:00 pm (Aso Lua – vaiaso 2 ma lona 4 o masina)
8. **Lotu Aso Sa** – 9:00 am / 4:00 pm
9. **Lotu Mafutaga Au Aiga** – Aso Lulu, 7:00 pm
10. **Vasega Lauga** (Lotu) – Aso Tofi 8:00 am
11. **Galuega mo le faamamāina o le Laumua** – 5:30 am

O sauniga lotu uma ia e le i aofia i totonu o le Ta'iala muamua. Ua na o se vaega o le olaga (*community life*) i totonu o le Laumua. Lea ua aofia uma nei i totonu o vasega faatulagaina o le polokalama a le BD. Le āfuaga lea o le filifilia e A'oa'o ma Faletua o le Tausaga 3 ma le 4 a latou lava vasega, ua le toe faatulaga atu e le Ofisa o le Resitara e pei ona sau ai muamua. O le mea foi lea ua faamamalu ai lava sa o le 'aai i le afiafi ma le po ina ia aua nei toe faalavelaveina A'oa'o ma Faletua ia latou meaaoga. E avatu ai foi ma le talosaga vaivai i le paia o aiga seia faautagia lelei taimi e asiasi mai ai i totonu o le 'aai ina ia tuu pea le avanoa i le po e mālōlō ma fai ai a latou tapenaga i meaaoga. E le afaina le ao e sa'oloto lava le asiasi mai o le aufaigaluega, a o le po ua amata le vavao a le 'aai.

O loo iai foi isi fuafuaga a le Kolisi e faataunuu i le afiafi ma le po. O aoga pese e faia lea i le tele o afiafi pe a mae'a faigalotu i aiga o le afiafi. O le po o le aso Gafua, Lua, Tofi o aso ia e faamamalu ai le sã o le faia o meaaoga—8:00 pm seia oo i le 10:00 pm. O le itula e 11:00 pm, o le vavao lena o le po e mālōlō ai le Kolisi e saili malosi mo faiva ma a'oa'oga o le aso e sosoo ai. O loo soli mai pea le malologa a le Laumua i le po e tagata e le o alaala i totonu nei. E talosaga atu i le mamalu o aiga ma matua ma uo sei faautagia lelei le sa a le Laumua i le po. E le afaina le ao seia aulia le 6:00 pm.

O le isi asiasiaga a le SPATS o lau Kolisi Faafaifeau o le Tausaga e 2022 pe aulia i le alofa o le Atua. O le ono (6) o le faamalumaluga o iai nei na amata ia Aperila, 2016.

## 3. O le Pepa (Thesis) ma lona Faatinoga

O se tasi o suiga fou ua iai nei le polokalama a le BD o le tusiina o **Pepa** (*Thesis*). E le ni faiva faigofie o feagai ma A'oa'o faapea alii Faiaoga i le faatinoga o lea galuega. Le isi lea taimi tele o le Faiaoga e alu e galulue faatasai ma le A'oa'o i su'esu'ega, faatonuga o tusiga, ma le tuufaatasia o le Pepa. O le faamoemoe ia mae'a

ma talafeagai ma aiaiga faatulagaina o le polokalama ina ia lafo i fafo e faitau a latou galuega. O loo matou galulue vaavaalua pea ma o tatou Kolisi Faafaifeau i Malua ma Piula, faapea foi le Kolisi Faafaifeau a le Pasefika i Fiti mo le faitauina o Pepa a le aufaigaluega. Ia ausia e le A'oa'o le togi e le i lalo ifo o le 70 (69, le pasia) ina ia pasi ma faauu i le polokalama.

Le ala lea ua faatulaga ai ia amata ona tapena le Pepa, su'esu'ega ma isi vaega, mai le Tausaga 3. O le kuata muamua o le Tausaga 2 e tuuina mai ai le Ulutala (*Topic*) ma Tusi Faatulagaina (*Bibliography*)<sup>1</sup> a le A'oa'o i le Ofisa o le Resitara mo le Fono a Faiaoga o sosoo ai; e iloilo ma faatulaga alii Faiaoga latou te galulue. E faalagolago lava le faatulagaga o Faiaoga ulutala o su'esu'ega—e.g. Mataupu Silisili (*Theology*), Tusi Paia (*Biblical Study*), Talafaasolopito (*Church History*), Saikolosi (*Psychology*), A'oa'oga (*Religious Education*), poo le Galuega Faafaifeau (*Ministry*), o tusi ai pepa a A'oa'o.

#### 4. Lalāgaina o se Ta'iala (Model) Faa-Samoa e Mulimulita'i ai Faaliliuga o le Tusi Paia

O se tasi lenei o matātī'a o galulue ai nisi o alii Faiaoga a lau Kolisi. O le su'esu'eina ma le fafāuina o se Ta'iala e faagasolo ma mulimuli ai le faiga o Faaliliuga (*Hermeneutics*) o le Tusi Paia. O le faamoemoe ia maua se faiga e tasi e soofau ai le Ekalesia ina ia tutusa le malamalama i le faatuatuaga i le Atua. O le tulaga o iai nei le Ekalesia e pule lava le tagata i lana metotia, ae tutusa uma i le agaga e faaliliu ai. O lenei la Ta'iala o galulue ai alii Faiaoga ia mamānu faatasi le Aganuu Faa-Samoa ma le Tusi Paia e ala i le fa'aaogaina o upu ma fuāitau Samoa ma upu o fa'aaogaina e tusitala o le Tusi Paia. O le ioimata ma le faamamafa a lenei Ta'iala o le “Iviā'ia” (*Structure*) ma le “Fitāituga” (*Process*) e fai ai su'esu'ega mo faaliliuga.

Soo se Mataupu Silisili lava e iai le “aa” (*root*) na tupu mai ai; le “fatu” na totogo mai ai. E le i tupu fua ona maua le atamai e tatou te faaliliu ai le fe'au a le Tusi Paia. O tala ma le fe'au a le Tusi Paia, Faaaliga a le Atua, na tusia ma faasaosao mai i tu ma aganuu a tusitala. Lona uiga, Tusi Paia o tala o le Faaaliga alofa a le Atua ua faamatala mai i le gagana ma tu masani a tusitala ua aofia ai—ata valivali ma faailoga (*metaphor*), amio (*attitudes*), tu (*traditions*), talitonuga (*beliefs*), tala o atua ma agaga (*ancient deities*), laueleele, tagata, ma isi lava ata eseese. O nei mea uma ua fa'aaoga e tusitala ua aofia i lalo o le ta'u—**Aganuu** (*culture*). O le pine faamau o lenei mau o le tōfā momoli a o tatou tuaā na fai ma “fofoga fetalai” o le Talalelei anamua—*E auvaa lualua le Lotu ma le Aganuu*.

Tau ia na ona ou talilumāfale se fesili mo lenei galuega, o le faamoemoe ia lalaga lava i faata'ita'iga Faa-Samoa e pei ona lalagaina foi e misionare papālagi mai Europa le ulua'i “lau polapola” e laulau ai le mataupu silisili ma faaliliuga a misionare na ta'ua o le “Mataupu Silisili Misionare” (*Missionary Theology*) anamua. O tatou lea ua soifua i augātupulaga o le Ekalesia Faapotopotoga Kerisiano Amerika Samoa (ma le EFKS) mai le Lonotona Missionare Sosaiete (LMS). Ua maua ai so matou lagona vaivai e su'esu'e ma fafau se faiga fou o faaliliuga o le Tusi Paia e nanāmu Samoa moni.

E le o toe po malaē ua tele tusitusiga lomia e faatatau i le faaliliuga o le Tusi Paia. Ia maua le atamai (*epistemology*) o faaliliuga o le Tusi Paia ma le faiga o faaliliuga, fesoota'iga ma gagana ina ia faasino tonu le tagata faitau pe faapefea ona faitau tusitusiga o anamua ua tuu faatasia i le Tusi Paia. O lea faiga ua na lu'iina le masani na amata e misionare ina ia faaopoopo iai le “ola faaleagaga” ma le faatinoga o tala o le Tusi Paia i le faagasologa o faaliliuga. O mataupu o aofia ai i lenei galuega—metotia, mataupu silisili ma le ola faaleagaga.

O le vaega muamua la o galulue ai nei alii Faiaoga o su'esu'ega i totonu o le Talafaasolopito o Faaliliuga o le Tusi Paia o seneturi ua tuana'i. Ua fai lea ina ia faasino tonu ma faamasani pe faapefea ona faaliliu le Tusi Paia ma faata'ita'i i olaga o tagata na tusia.

O lona lua, ua galulue e toe faitau lelei ma fetuutuuna'i faiga ina ia fautuaina se auala talafeagai ma malaulau o iloilo (*analysis*) ma faaliliuga (*interpretation*). E tūa lea gaoioiga mo le fautuaina o se metotia o su'esu'ega ma faaliliuga o le Tusi Paia ua talafeagai mo le Mataupu Silisili Faa-Samoa; aemaise lava o tatou augātupulaga ua telelise le tekanolosi ma ua 'apo e fanau le momose o “ata valivali ma tala faapei e moni” ua faalogo pea ma vaavaai i ai i televise ma leitio, ma fanau na soifua i atunuu i fafo ua toe fo'i mai.

<sup>1</sup> O le Ta'iala ma Tulafono mo su'esu'ega ma le tusiina o le Pepa o loo i le Faletusi le Faavaa e faitau lelei ai A'oa'o ma Faletua ia malamalama ma mulimulita'i ai. O le sitaili tusipepa ua ta'ua o le Chicago Manual Style, ma o lona faafaigofieina e Carole Slade, Edition 14, ua faaoga e A'oa'o ma Faletua o le Kolisi. O le Ta'iala foi lea ua faamauiina i pepa a le Aoga i le Komisi o pasia Aoga a le Pasefika—SPATS ma le *Pacific Qualification Framework*.

## Nisi o Faiva ma Taulumaga Faagasolo a lau Kolisi

### 1. Maota o A'oa'o e Leai ni Faletua – Dormitory

Talu mai le aafiaga o le Afa o GITA o loo tau faamae'a pea le faaleleia o le Falenofo o A'oa'o e leai ni Faletua. Na iai meatotino a A'oa'o na faaleagaina e le afā. Na taumafai lava e saili fesoasoani mo nai A'oa'o, aemaise lava o le nofoaga o alala ai ua faaletonu. Na umi se taimi o nonofo pogisa A'oa'o ona ua aveese e le ASPA le mita (*meter*) o le uila e le o toe saogalemu ona nonofo ai A'oa'o. Na taumafai loa e saili ni fale 'ie ma ua maua mai le ACE ma faatau mai ai loa fale 'ie e lua (2) e amata ai. E ui na malu teisi o A'oa'o ae na faaletonu lava ona o timuga mamafa o lena vaitaimi.

Na saili sa'o loa i le mālō se fesoasoani e ala i le Ofisa o le Lutena Kovana; o ia foi na loo faauluulu i ai taumafaiga a le mālō o polokalama mo le faaleleia o le atunuu. O le aoauli o lea lava aso na susu mai ai lana Afioga i le Lutena Kovana, Lemanu Peleti Mauga, ma silasila i le maota o A'oa'o ua matuā faaletonu lava. Na silasila foi i fale 'ie o nonofo ai A'oa'o e le o lelei. O le aso na sosoo ai na taunuu mai ai taavale ma Fale 'ie tetele e fa (4), o ogaumu kesi laiti matāafi tasi e 4, *coolers* e 4, ma ato First-Aid e 4. Na asia foi le Ofisa o le Koluse Mumu ma alolofa mai i moega (*cots*) e 19 mo fanau ia a le Ekalesia na mana'omia se fesoasoani.

O le taimi nei o loo tau faamae'a le galuega o le fale. E faafetai ai i le Komiti o Fe'au Eseese i le taumafaiga o lenei galuega ia faataunuu. E faafetai atu foi i le susuga i le Failautusi (*Acting*), Rev. Ioelu Onesemo, ua tuua lava ona faiva tataua a ua faaleleia i le galuega; faatasi ai foi ma le agaga faafetai i nisi o uso mai le Ofisa o Aoga Kerisiano, Sui Faatonu ia Soosoo Tuiolemotu, Rev. Pesamino Tuitea, Rev. Sega Ifopo, ma latou na fesoasoani i le galuega.

Faafetai i le alofa i fanau a le Ekalesia.

### 2. Tusi Fou mo le Faletusi – Bert W. Tofaeono Library

O le lumana'i o lau Kolisi Faafaifeau e faamoemoe i lana Ekalesia. O lona atina'ega ma le faatinoga o polokalama a'oa'oina faaleatamai o pou tuloto ia o soo se aoga e fia manuia. Ua telelise le atamai faatekanolosi ua suia le tele o faiga ma taulumaga o aoga, mai le “faifaimalie” (*taking time*) i le “faavavevave” (*quick time*). O le tele o Kolisi Faafaifeau a le lalolagi ua ausia le suiga lua o le “faavavevave” ina ia taufetuli faatasi ma le saosaoa o iai nei mataupu a'oa'oina ma le atamai poo agavaa talafeagai. Ua lu'itauina pea lau Kolisi Faafaifeau i Kanana Fou ia silasila i lana Ta'iala atoa ai ma mataupu o a'oa'oina poo talafeagai lea ma le faamoemoe o le Ekalesia Aoao o le 21 seneturi. O le tasi la lenei o atina'e o loo taumafai pea ia faamautu auā lea faamoemoe tāua, o le faatauina o tusi mo le Faletusi, Bert W. Tofaeono Alumni Library. O lenei Tausaga Aoga 2017-18, e 1,470 le aofa'i o tusi fou ua maua mai. O le Tausaga Aoga 2016-17, 1,307 le aofa'i o tusi fou. O loo taumafai pea ia faaauauina lenei galuega i taimi uma e lafo ai le “Taulaga mo le Seminare” i tausaga ra'itasi. Mo lou silafia, o tusi o le Faletusi ua fa'aoga iai le 25 pasene o le Taulaga a le Seminare. Ua aga'i atu le tatou Faletusi i se tulaga lelei ma mautu. O loo taumafai pea ia maua nisi o meafaigaluega o faletusi o aso nei e fesoasoani i le faamautuina o le Faletusi, faapea foi se fesoasoani ia faamāmā avega i le faailogaina (*cataloguing*) ma le faitauina (*inventory*) o tusi o le Faletusi.

E tele tusi tuai sa fataina i le Faletusi ua leva ona le toe fa'aagaina (*outdated*). O tusi uma na ua tuu i luga o le laulau mo A'oa'o ma Faletua, e ave fua e leai se tau. E tele foi tusi ua leva ona le iloa ma ave faananā (o se isi faaupuga ua gaoi) e tagata mai totonu o le Faletusi. E le faigofie le galuega a le faletua o vaaia le Faletusi ona o tulaga faapenei e tutupu. O le upu moni lava, o le lisi na maua a'e i nisi o pusa ma pepa o i le Faletusi e tele lava i le aufaigaluega faifeau na o ma tusi. Ou te le o toe talosagaina ia toe faafo'i mai tusi. Leai. Pau o lau tatalo ia manuia le Faletusi a le Kolisi.

O isi mea e pei o **fatatusi**, **laulau**, ma **nofoa** e nonofo ma faitau tusi ma su'esu'e ai A'oa'o ma Faletua o loo taumafai pea ia maua mai. Ua taunuu mai foi nisi o Komepiuta e fa, ma 'Ea Malulu (*Air Conditioning*) e fa na talosagaina i le Komiti e faaleleia atili ai le Faletusi auā tino o tusi ia lelei pea. E tele lava nisi o vaega o le Faletusi o fia faaleleia ae faalagolago lava i tupe e faamatuu mai e le Komiti e faatino ai ia galuega. O loo fia

maua foi se masini e tuu i le faitoto'a e iloa ai tusi o loo ave i fafo ma le Faletusi e aunoa ma le siakiina i le laulau (*circulation desk*).

### 3. Sikolasipi a Faiaoga o le Kolisi – Rev. Pasesa Sapolu & Rev. Simi Mauga

O le isi vaega o le tamāoaiga a le Ekalesia o loo faataunuu ai lenei faamoemoe tāua o le aufaigaluega o galulue i le Kolisi—o a latou sikolasipi. O le 60% o le “Taulaga mo le Seminare” o loo faatino ai le totagiina o aoga a susuga i Faiaoga—mataupu ma le fale o alala ai. E to'alua susuga i alii Faiaoga o faa-sikolasipi i le taimi nei mo faailoga o le foma'i—Susuga ia Rev. Pasesa Sapolu, *Doctor of Philosophy* (PhD) ma le Susuga ia Simi Mauga, *Doctor of Ministry* (D.Min.). Ua le o toe mamao ona mae'a lelei lea o taumafaiga a susuga i alii Faiaoga. Talosia pea lo laua faamoemoe auā le faaleleia atili o le tapenaga o Faiaoga mo le Kolisi. E pei lava ona ou faailoa atu i le ripoti le saosaoa tele o a'oa'oga faalemafaufau ma le mataupu silisili i aso nei, ua suia ai le tele o talitonuga na sau a'i, ma ua lu'itauina ai le faatuatuga o le Ekalesia, atoa ai ma le suiga o Ta'iala o polokalama a'oa'oina faalemafaufau a lau Kolisi.

A lelei ma a'oa'oina alii Faiaoga o lau Kolisi, o le a manuia foi le alualu o mataupu o a'oa'oina ma tapena ai le aufaigaluega—A'oa'o ma Faletua—o loo saunia i totonu o le Kolisi. Ua tele lotu i aso nei, o isi ua mapo lotu, o isi e tausini a le faamamafa na sau ai ua le toe talafeagai ma aso nei. O le Tusi Paia na saunia mo tagata anamua, a ua aulia mai o tatou augatupulaga. Ua faigofie tele i isi tagata ona faaliliu le Tusi Paia ua pei a o tala na tutupu ananafi. Ua faamoemoe tasi i “lagona faaletagata” ae lafoa'i le a'oa'oina o le mafauafau ina ia manino i le talafaasolopito o tusi, mataupu silisili, ata valivali/faatusa, ma fesuaiga na tuutuugutu mai e augātupulaga anamua. O le faigofie foi lea ona liu lotu tagata iā latou lotu. A oo ina faalagolago le liliu o le tagata i “lagona faaletagata” ona o le faigofie o faauigaga o le Tusi Paia, tupu le faaletonu. Ua ta'eta'ealuga le sufiga o le fe'au a le Atua—Tusi Paia. Le ala faatutu lena o Kolisi Faafaifeau a le Ekalesia Samoa—Malua, Piula, Kanana Fou, ina ia a'oa'oina metotia ma le atamai faalemafaufau e sailili ma lagalaga ai le moni o le fe'au a le Atua o tanumia i lalo ifo o tala ma ata faatusa a le Tusi Paia. O le popolega, e faapefea ona tatou malamalama i le Tusi Paia mo aso nei? Le tāua lena o le a'oa'oina o le aufaigaluega ia atamamai mo le “vaeaetonuina” o le Tusi Paia. Ua mafua iina lo'u talitonuga ia lelei faiaoga mo le a'oa'oina o fanau auā le Ekalesia ma lana misiona tala'i.

### 4. Tusitusiga a le Alii Peresitene

O se tasi lea o matāti'a tāua o taumafai ai alii Faiaoga i totonu o le Laumua, o tusitusiga mo mataupu e faataata i le Tusi Paia, ekalesia, faapea le olaga lautele. O le tausaga ua te'a, Aperila 2017, na tatala aloa'ia ai la'u tusi muamua, *Faalelegā Fulu o le 'Au'afamau a le Atua*. O le tausaga lenei ua mafai ona lomina nisi o tusi e lua (2) – *Tālatāla le Fili a Alii: Le Atua Fetalai* ma le tusi faaperetania, *We Really Lost Jesus in Hermeneutics: Fashion Me a Theology of "Samoan-Jesus."* O nei galuega tusitusia ua taumafai ina ia saili ai nisi o tupe mo le faaleleia atili o lau Kolisi Faafaifeau. Ua fesoasoani tele i nisi o taualumaga a lau Kolisi e leai se tupe e faatino ai, e pei o to'ana'i i aso Sa Faapitoa—Lotu Tamaiti, Aso Sa Tinā, Faamavaega ma isi mafutaga. Ua fesoasoani foi i nisi o pili o totogi a lau Kolisi. O le a foi se tamāoaiga e maua mai i nei tusi o le a fa'aaogaina lava mo fuafuaga a le Kolisi.

O le tau o tusi ia e lua e tutusa lava ma le tusi muamua, **\$35.00**. Ua faatauina i se tau taugofie mo le mamalu o le Ekalesia. O nai seuseu atonu lava e aoga i lau ta'igafi i se aso.

### 5. Suega Ulufale – 2018-2019

O le a faia le Suega Ulufale a le Kolisi i le masina o **Novema 23-24, 2018**. E faia lea i le Potu Su'ega (*Media Room*), Faleaoga, itula e **8:30 am**. Mo latou uma o faamoemoe e su'e i lenei Suega, o tusi o le Suega o **HAKAI** (Feagaiga Tuai) ma **LUKA** (Feagaiga Fou).

## Telelise Suiga o A'oa'oga Faa-Mataupu Silisili & Gagana o Aso Nei

Ua taea i la'u ripoti lenei mataupu tãua tele mo le silafia e le Ekalesia. O se tasi lea o faiva tãua o la'u galuega ua tofia ai au e Tamã o le Ekalesia—mataitũina o gasologa ma suiga o le lalolagi ina ia fuafua ma tapena ai le soifua a'oa'oina o fanau a le Ekalesia. E tele suiga ua aafia ai o tatou tupulaga ma pu'ea faamanu i ofaga a tatou augãfanau. O A'oa'o ma Faletua o a'otauina i le taimi nei, o faiaoga laia o aulotu a taeao. A lelei ona faatufuga ma paepae le aufaigaluega o le taimi nei e manuia le faalelegã fulu a le Ekalesia i le lumana'i. Ua tai faana'e le tele suiga, ua iai foi feteena'iga mai faiga na masani ai. O le mea tãua, e tataua ona tatou malamalama i le talafeagai o suiga ma le mafua'aga o feteena'iga.

O tatou tupulaga ma augãfanau ua pu'ea ma nofo to'ilalo i le malosi ma le moni o FETEENA'IGA (*tension*) faalemafaufau ma le faaletino. Mo matou i totonu o le Kolisi Faafaifeau o le faafitauli ua masani ai. E le fou a ua pa'ua'i i totonu o Kolisi. O le Kolisi Faafaifeau o soifua i lona tulaga moni ma faiva masani e le taumateina ona aafia pea i nei "feteena'iga." E fa (4) ni mau ua faapito 'augafa iai la'u faasoa.

- Muamua, o le feteena'iga o le *Tuana'i* ma le *Taimi Nei*.
- Lua, feteena'iga i le vã o le *Faatonuga a le Talalelei* ma le *Mana'o o le Ekalesia*.
- Tolu, o le feteena'iga i le vã o le *Ekalesia Moni a Keriso* ma le *Mea Moni o Tutupu i Aulotu*.
- O le mau lona fa, tele o feteena'iga laiti o loo lelepa ma paologia ai, o le feteena'iga ua na ta'alaina le tulaga o le soifuaga e le mo na o kolisi faafaifeau poo ekalesia foi, ae mo Kerisiano uma ua onomea iai le ta'u Kerisiano, o le feteena'iga i le vã o le *Faatuatua* ma le *Lalolagi*.

Le olaga ua nofofale ai feteena'iga—o le 'aupega e paepae lelei ai le fua faatatau a Kolisi Faafaifeau e tauivi ma lu'itau o mataupu eseese i aso nei. I totonu o lona paepae e tataua ona tatou iloilo lelei "foliga" o mea o tutupu e faatufuga ai ni fausaga mautu mo a'oa'oga faa-mataupu silisili e a'oa'oina i Kolisi Faafaifeau i le taimi nei.

Ua manino le mata o le vai, ua molimauina foi e le mau ua ou ta'ua o le "Sua Tutu'i Taalili o Lotu" ua faaperetania *The Current Booming of Churches*. O le tala moni, leai se tasi na te toe lu'iina le mau lea. E oo a i igoa o Lotu ua lolotu! Ua tala lotu ma mapo lotu tagata! O le mea moni, o le Taalili ua lagona i totonu o le atunuu.

### 1. Vaega Tãua o le Sua Tutu'i o le Tai Taalili o Suiga o Aoga Faa-Mataupu Silisili

Nisi nei o le feteena'iga o le "Sua Tutu'i Taalili" ua iai nei Lotu ma ua poloa'iga suiga o faiva ma tiute ma polokalama a lau Kolisi Faafaifeau. Muamua, ua mana'omia se alãfua poo se ta'iala talafeagai o le "loto mau" (*self-confidence*) ma le "loto faamãlõsi'au" (*self-empowerment*) e pei ona talanoaina soo i fono a Pule Aoga ma Ta'ita'i o Ekalesia a le lalolagi. Faata'ita'iga, o le mau e lagaina pea i talanoaga i totonu o ekalesia, poo le mea ea o le tele o Lotu ua mafua ona ua mātūtu poo ua leai foi se "ola faaleagaga"? O le uiga o lenei mau mo lau Kolisi Faafaifeau, ia tataua ona faa'aupega lelei le aufaigaluega o a'otauina ina ia "loto mau" ma "loto faamãlõsi'au" e ta'ita'i le ekalesia i le lotoivai o tafega o "suiga o tai faaleagaga" ma sauniuni e fetuuna'i ma faatonutonu, i taimi uma pe a mana'omia, e oo lava i taimi e osofia faafuase'i ai e tai papa'u a le 'au mapo lotu ma le faaletino.

Lua, e le o iloa tele lea vaega, o le "toe faafouina o lotu" (*church revival*). Tausaga e 1517, na āfua i le faifeau Siamani o Matini Luteru i lona lu'itauina o le Ekalesia ina ia fetuuna'i ma toe iloilo lona faatuatua mai a'oa'oga na sau ai ua aafia. O lea faafouina na faatu tonu i le toe vailiiliina o le vã fealoa'i o le tagata i le Atua ma lana faaolataga (*moral distinction of God's salvation and human*). E tele suiga na āfua mai ai e oo mai i o tatou vaitaimi ma augãfanau o soifua i le taaliliga fou o le olaga faa-tekanolosi ma talaiga a isi lotu. E ui ina tele ata faanoanoa ua tatou vaaia o ni taumafaiga ia faatupuina le aofa'i o tagata lotu ma tusitusiga faatuatua, ua iloa manino i totonu o lotoifale o aulotu le moomia o le ola faaleagaga. O le ata manino ua tatou iloa "ua solo le falute o 'ele'ele faaleagaga na ati ai le ekalesia – *We are not gaining ground! We are losing ground* – le Ekalesia Kerisiano.

Tolu, lotu ma le amio Kerisiano, ia galulue vaavaalua ia fa'aauuina le aga'i ese atu mai le itulagi faanoanoa o iai nei. Poo se faafouina o le amio lotu (*Christian character*) ina ia o tutusa ma le faafouina faaleagaga (*spiritual renewal*) o iai nei—toefuata'iina o le ola ma le lotu—poo le lotu o le a maumau ona ua le fua mai e pei o se vai ua miti'ia i 'ele'ele mātūtū. Pe afai o lea, o le a sili atu ona faaletonu le i'uga—o le lotu ua le mafai ona fua mai ma le amio Kerisiano ua le tapasaina – *chaos*.

O le lu'itau mo le taimi nei i lau Kolisi Faafaifeau. Muamua, ia manino ma mautinoa po o fea o tu ai lau kolisi i lenei mataupu atoa o le toefuata'iina o le lotu. Ia sosoo ai, faamautinoa lenei ma manino le talitonuga poo le a le fesoota'iga o le lotu ma le amio Kerisiano e tataua ona ola ai. I le ma lea, ia 'apa'apa ma loto iai e aumai ae le na o le feliiua'ina o le mafau'au; o tu ma aga a le ola ua liliuina i ta'iala ma a'oa'oga Kerisiano, ua faamalamalamaina, ua faatuma'ina, ma ua matua le faatuatuaga moni faa-Kerisiano.

E iai le isi itu o le “toe faafouina o lotu” i aso nei. Ua tutupu malosi i tua atu o itulagi ma tulu'iga ua tatou faaigoaina ma taualoaina—o lotu tāmāu (*conservative or conventional*), Porotisano taatele (*ecumenical Protestantism*)—ua molimauina le salalau i fafo atu o a tatou ekalesia faapotopotoga. I le lalolagi atoa ua molimauina le fua tele mai o lotu tāmāu Porotisano taatele ma ua faasoosoina e momotu ese latou ma faaigoa o lotu “Tāvāvae” (*the Sects*). Ua faailoa i a latou lava talitonuga o latou o tagata ua faamamafaina le Toe Afio mai o le Alii (*Adventist*), o tagata paia (*Holiness*), Penetekoso (*Pentecostal*), poo le Ekalesia a le Atua (*Church of God*). O le fesili e tuu sa'o mo tatou i lotu uma nei: O le a se mea ua tatou iloa e ese ai? O ifea lea e tulu'iga ai i lona faamatalaina o le faatuatuaga Kerisiano ma faaliliuga o tiute Kerisiano? E iai se faaeteetega o filimea ai?

Ou te tautala ma le faaeteete. O le fesili ua valaauina lau Kolisi Faafaifeau e tali: *O le a se tulaga lelei ma le faapitoa ua a'oa'oina ai tatou mai lotu nei?* O le mea ia tatou iloa o latou faatuatuaga ma le olaga o soifua ai, i le tuu faapaleni, ua latou tala'iina le latalata i le ulua'i ekalesia na i loo tatou. E logo pea i o'u taliga, o le mea lea ua toe manatua ai le amataga mai o le lālā o le Porotesano Toefuata'iina (*Reformed Protestant*) ma faamaonia e le talafaasolopito e sili atu lona malosi ma le alualu i le faamatalaina o le agaga o le Toefuata'iina—le gafa o le to'atele o tatou e talia, ta'ua e tusitala o le talafaasolopito o Porotesano Toefuata'i. Ua aofia ai ekalesia Papatiso, Faapotopotoga, 'Au Soo (*Disciples*), ma isi. O le ā lā se faailoga ua aliali ai “vaivaiga” i totonu o a tatou ekalesia i aso nei, ma le tapenaga o le afaigaluega mo le galuega tala'i a le ekalesia o le 21 seneturi?

## 2. Faafitauli o le Gagana Tautala e Fesoota'i Atu Ai

Pe a toe tusi le talafaasolopito, o tupulaga ma augafanau o aso nei o siamupeni. O aso nei o le maoa'e ma le telelise o le tekanolosi, o ala o “tala-fesoota'i lautele” (*social media*) o le sifi. Ua vave ma ua tele ua aafia ai tagata uma i lona faaagaina. O tatou i Samoa e tu i le ogatotonu o le lalolagi i le to'atele o tagata e faaagaina “tala-fesoota'i lautele”—e 58% faatasi ma isi atunuu. O le atunuu o Initia e sili atu i le lalolagi, 98%; Amerika e 80%. O le mau faama'ina, o Initia e 450 miliona tagata o faaagaina a'upegatafa'ilagi (*internet*) o le aofaiga atoa e 15% o le lalolagi o faaagaina a'upegatafa'ilagi. I le ma lea, pe a ma le 213 miliona tagata Initia e iai a latou **Facebooks**; e latalata i le 25 miliona tagata Initia e iai a latou **Twitter** ae pe a ma le 175 miliona o tagata e faaoga le **WhatsApp**.<sup>2</sup>

E silia atu ma le 65% o tagata o le lalolagi i lalo ifo o le 35 tausaga le matua ma o le tupulaga lea o loo malosi e fesoota'i pea i talatalanoga lautele. O le matagofie o le “tala-fesoota'i lautele” o le sa'olotoga e faaoga ai; e pule le tagata. E faaoga e le tagata matua ua faapea foi le tamaititi. O isi ua sili atu ona pele ala o “tala-fesoota'i lautele” i isi mea. Ma o le sa'olotoga lea ua le taofiofia e lagona ai le popole. Ua molimauina o tagata o faaagaina lenei faiga o fesoota'iga ua sosopo atu i ona tulu'iga, ua seu lava le manu ae le taga'i i le galu. Ua faitioina ma faaleaga ai e isi o tagata ma le malo, faalapopototoga ma sosaiete ma atunuu i luga o “tala-fesoota'i lautele.” Ua avea lea ala ma 'aupega a le isi tagata e tuu ai lalo le isi. “Maunu” (*luring*) o le upu liliumata lea o aso nei. Talanoaga i igoa o lotu ma le lotonuu o mataupu lauiloa ia o taufaaleaga i luga o “talatalanoga lautele.” Ua faama'ina foi o fanau pe a ma le fa-lima tausaga e iai a latou foi **Facebook** ma Instagram ma e fiafia e ta ai luga upu ma faapipii ai ata. O le faanoanoaga sili ua foliga mai o tamaiti'i o faaagaina lenei faiga o “tala-fesoota'i lautele” ua sili ona aafia. Ua tele ina faamasiasi latou i upu masoā ma mau e le faavaeina. O nisi o tala ua sili atu ona matuiā e le gata ua faamasiasia le tagata ma lona aiga a o le atunuu foi.

<sup>22</sup> O ia mau na maua mai le Stat Center GlobalStats Press release, April 2018.

O le fesili tele e faapea, “Pe le o le gagana ea o ala o “tala-fesoota’i lautele” ua atagia ai le gagana a o tatou tagata ma sosaiete? O le mea ea ua tatou ta’u faamaulaloina tagata po o ua le mafai ona tatou a’oa’o tupulaga i le gagana sa’o ma talafeagai?

O le ala ma le fausaga o faia ai a tatou a’oa’oga (*education system*) ua mana’omia ona matua silasila toto’a i le aafiaga lenei. Talu ai ona o lenei tusiga ua faapitoa lava i la’u Ekalesia Faapotopotoga Kerisiano i Amerika Samoa, o le isi lenei matafaioi mautinoa a le Ofisa o Aoga Kerisiano. I le ma lea, ua faapena foi i le Kolisi Faafaifeau i Kanana Fou o loo matou galulue ai. O nei gagana faalumaluma ma faamasiasi tagata o “tala-fesoota’i lautele” i luga o upegatafa’ilagi ua na ta’uleagaina le tatou aga’i i luma. O tu ma aga fa’aaloalo na a’oa’oina tatou e o tatou matua ia aua nei tatou faia se mea e tau ai le leaga i le isi. O aso nei o le faaleagaina ma le faamasiasiga o le tagata ma isi uma i le igoa o le lotu, tagata ma le malo ua sili atu ona mata’utia le leaga. O le ata faailo lea ua tatou iloa ai le “manifinifi” ma le maulalo o le tatou sisitemi (*system*) o a’oa’oga.

O la matou su’esu’ega, o le aa o lenei faafitauli e taoto lava i le faapotopotoga ma lana sisitemi o a’oa’oga. E talanoa pea le malo i le faaleleia ma le toe atia’e o a’oa’oga e talafeagai ma fanau o tatou aso. Ua matou talitonu ua televave le vaavaai aga’i i luma; ua opogi vave suiga o luma, a o se mea lelei. O le faaletonu, e le i mae’a ona “toto le niu i le tuā’oi” o ananafi ma ananei ina ia aulia manuia taeao. O se faata’ita’iga, soo se lauga lava a se A’oa’o e le i lelei ona tapena lana tuvaoga (*introduction*), e le malamalama le lauga; e salalau. E le i lelei ona “toto le niu i le tuā’oi” na mafua ai ona soli; e le iloa. Se tasi lea o taumafaiga a lau Kolisi o le faataotoga o se alafua e faatonutonu ai A’oa’o ma Faletua ia avea ma tagata faigaluega agavaa a le Ekalesia. Ma o le isi lea mafuaaga tatau na ala ai ona faaopoopo i le Kolokiuma (*Curriculum*) a lau Kolisi le tāua o mataupu e pei o le filosofia (*philosophy*), saikolosi (*psychology*), faufautua (*counseling*), ma le tōfā fetuutuuna’i (*critical thinking*). E ui ina taofi nisi e tuu le Faa-Samoa aua nei a’oa’oina i lau Kolisi, ua ou talitonu ma lo’u mautinoa o le Gagana Samoa ua tatau ona a’oa’oina o se agavaa (*skill*) ma ia mafai ai e A’oa’o ma Faletua ona tuitusi ma malamalama i lana lava gagana. Ua tele ina faitio le lautele e le iloa e le aufaigaluega o a’otau i le Laumua ona tautala Samoa. Faapefea ona iloa pe a le a’oa’oina?

O le isi fautuaga, ua faamamafaina e lau Kolisi i lana Ta’iala ia iloa e le A’oa’o ma le Faletua ona faaoga le initaneti, upegatafa’ilagi. E tofua le faiaoga ma lona taimi e faasolo ai A’oa’o ma Faletua i le Faletusi e a’oa’o i le faiga o su’esu’ega i luga o upegatafa’ilagi. Fai mai le atamai o Albert Einstein, “Saienisi e aunoa ma le lotu e pipili, lotu e aunoa ma le saienisi e tauaso” (*Science without religion is lame, religion without science is blind*). O lea foi e manino i le tōfā manino ma le atamai o Einstein le o faatasi o le teknolosi ma le lotu. E mafua ona faaletonu ona o le tagata ua soona fai ma sopo tapulaa i alāsavali ua uma ona toto ai “niu” e iloa ai le tuā’oi tonu e savali ai. Manatua foi o tatou i Samoa e mamana ona tuā’oi ‘ele’ele e le soona sopo ai se tasi. E sosopo loa le tagata i lona faaogaina o “tala-fesoota’i lautele” i luga o upegatafa’ilagi ona tapu lea. Soo se taimi ia fai ma le faaeteete o loo vaavaai ma matamata le lalolagi.

O aso nei o le a’oa’oina ma le iloa ona “tala-fesoota’i lautele” ua agatutusa ma le le malamalama i le aganuu. O le faasalalauina o faamatalaga le sa’o ma tuitusiga ua fai mai e moni us molimauina e leaga mo tatou tagata ma le atunuu. O le mafuaaga autu lea na faasaina ai “talatalanoaga lautele” i taimi o faalavelave ma misa. O le faaogaina tele o le atamai faafoliga e le lelei. O se tasi o fe’au matagofie a le WhatsApp ua faamalamalama ai lenei faatusa—“O le WhatsApp ua na a’oa’oina i tupulaga talavou se lesa fou, ua tuto’atasi mai le tagata mai se faapotopotoga ina ia avea ma tagata lautele (*social*).

O le faapuupuua o lenei a’oa’oga, ma ia maua se manatu i le faafitauli o le gagana tautala e fesoota’i atu ai i tagata, ua avea ai alii Faiaoga o lau Kolisi ma “ave taavale” e a’oa’oina le aufaigaluega o A’oa’o ma Faletua ina ia iloa ona pu’e, faasoa, fetuuna’i ma faaoga le gagana tautala. Ua faia lea galuega fesoasoani i aso o Vasega Lauga (Aso Tofi). Ua mafai foi ona faataunuu i galuega a le nuu (Aso Toona’i), ma faiga lotu faitele i le afiafi (Aso Gafua, Lua, Faraila) pe afai e talafeagai. O le gagana Faa-Mataupu Silisili o le isi lea gagana e ese mai le gagana tautala o aso uma. O lea gagana e fausia lava i upu mai le Tusi Paia ma lona faaliliuina, ona toe faapuina lea i le gagana Samoa.

O le a le tele ua tele? O le fesili tuai ae tumau pea lona taua. Le mafuaaga lea e le nofonofo ai le ma’elegā o susuga i alii Faiaoga ia latou su’esu’ega, ma le tatalo i le Agaga ina ia maua pea ‘aupega o le galuega e fesoasoani i le a’oa’oina ma le tapenaga o A’oa’o ma Faletua mo le misiona a le Ekalesia.

## O le Faafetai mo Latou na Alolofa Mai

E fatumanava a'oa'oga a le Alii o le “alofa.” O la Ioane fai mai, “O se le alofa ua le iloa e ia le Atua; o i latou uma foi o e alolofa ua fanau mai i latou mai le Atua, ua iloa foi e i latou le Atua” (I Ioane 4:8).

O upu faaalualu ia a le aposetolo o Ioane e momoli atu ai le agaga faafetai o le Kolisi mo latou uma na agalelei mai i lenei Tausaga Aoga 2017–18, ua tuana'i atu. O le mamalu o le Ekalesia ma latou uma na togī sao ia outou taulaga foa'i i soo se mea, faafetai tele. Nei galo nisi o i latou na alolofa mai, o loo silasila le Atua.

1. Rev. Puleinuutu Tafao, Ekalesia i Oceanside, \$3,000.00 – fesoasoani mo le Kolisi i taimi faigata
2. United Church of Christ mo A'oa'o na faaleagaina a latou meatotino, \$3,000.00
3. TZU CHI Chinese Medicine Team, Cash Cards mo A'oa'o e to'avalu, e ta'i \$300.00 a le tagata.
4. FEMA, siaki tupe mo A'oa'o e faatau ai a latou meatotino na faaleagaina (eseese aofa'i o latou siaki; e fuafua lava i meatotino na faila i le FEMA)
5. Ofisa o le Lutena Kovana, Hon. Lemanu Peleti Mauga, 4 Fale le tetele, tapoleni tetele, kula (4), ogaumu matāafi tasi (4), ma isi tapenaga.
6. Ofisa o le Koluse Mumu (Red Cross), 19 moega (cots) mo A'oa'o
7. Mafutaga Aoao a Tinā, EFKAS, (Aso Tatalo Tinā o le Lalolagi) foa'i mai le \$1,000.00 mo le Mafutaga a Faletua ma A'oa'o a Kanana Fou
  - a. \$500.00 mo faailoga o Su'isu'i a Faletua, Laugā Togi
8. Susuga Faifeau ia Tafa & Sauiluma Muasau, alofaaga i le tele o aso mo le Kolisi e ala i mea taumafa ma vai inu.
9. Susuga Faifeau Toeaina ia Fiti & Alofa Aofia – tupe na foa'i mai mo le Kolisi
10. Susuga Faifeau Toeaina ia Leatulagi & Vagai Faalevao – tupe na foa'i mai mo le Kolisi
11. Susuga Faifeau, Faafetai & Mafo'e Faavae (Pago Pago), Faifeau, Sio Opeta & Ianeta Opeta (Atuu), Faifeau, Liusamoa & Dora Simolea (Futiga) – na agalelei mai i taumafataga e tele mo Su'ega Faai'u o lenei tausaga. Faafetai le agalelei.
12. Susuga i le A'oa'o ia Li'avaa & Pearly Moevao, taumafa mo A'oa'o ma Faletua o le Kolisi
13. Senatoa ia Tuaolo & Fiapa'ipa'i Fruean, agalelei mai i tupe na foa'i mo le Kolisi
14. Mafutaga a Tinā Fagaloa – o le asiga e ala i taumafa, vaiinu mo le Kolisi; sa tofufusia ai le Laumua
15. Rev. Iasepi & Leone Ulu – fesoasoani mai pea e ala i vai inu ma taumafa
16. Rev. Semo Tapaleao – fua o faaeleeleaga (taro) mo le Kolisi
17. A'oa'o Fesoasoani ia Sapini Siatuu – faailoga mo le Laugā Togi; meālofa e ala i tusi mo le faletusi
18. Rev. Sio & Ianeta Opeta – foa'i tupe mo le Peresitene ma le kolisi
19. Tiakono ia Utu Abe Malae – ASPA, i nisi o mana'oga o le uila a le Kolisi
20. Tōfā ia Fauaa Kataferu & Katerina Elisara – o loo agalelei mai pea i Fale 'Ie e faaoga mo le tele o fuafuaga a le Kolisi.
21. Faatonu ia Filifatali M. Fuiava – Matagaluega o Faatoaga, pemitā o mea fia maua mai a le Kolisi
22. Mo latou uma o loo agalelei mai pea e ala i faailoga mo le Samiga Tausaga & Laugā Togi
23. Faiaoga, A'oa'o, Faletua – mea uma ua outou foa'i mo le Kolisi; faamanuia atu le Atua

Pe afai lava e iai se tasi ua le maua atu lona suafa, o loo silasila le Atua i lou agalelei ma le 'aao mafola. E le galo i le Atua se matāua o le afu liligi o ou 'aao tautua. Faafetai tele.

## Valaaulia mo le 150 Tausaga a le Kolisi Faafaifeau i Piula (1868-2018)

Na faimeālofa atu ai lau Kolisi Faafaifeau i Kanana Fou mo lana pa'aga ma le usoga ia Piula, o le *Plaque* o tusia ai faamanuiaga a le Kolisi ma le EFKAS: plaque, \$325.00 WST ma le mealofa tupe e \$5,000.00 WST.

## Aufaigaluega a Lau Kolisi Faafaifeau – Tausaga Aoga: 2017-2018

---

Ua avea foi lenei avanoa e toe momoli atu ai le agaga faafetai tele i le Laumua. Ua mālō le galulue i lenei tausaga, lea ua tuta lelei i fanua lo tatou sa, leai se tala vale “ua toe mama ā ia Ti’a le vaa o Ti’a” e faalogoina. Na o le alaga o le fiafia. Viia le Atua.

### Ofisa o le Kolisi

Rev. Dr. Moreli J. Niuatoa, Peresitene  
 Rev. Nafatali Falealii, Sui Peresitene  
 Rev. Timoteo Esekia, Resitala  
 Bur. Apisaloma Toleafoa, Faiaoga Teutupe  
 Sec. Ana Tu’igamala, Failautusi Fesoasoani  
 Lib. Evelyn Eveni, Malu o le Faletusi

### Faiaoga ma a Latou Tiute A’oa’o

Lect. Dr. Ben Laie, Feagaiga Tuai  
 Lect. Romeo I. Seiuli, MABL, Feagaiga Tuai  
 Lect. Dr. Elekosi Lafitaga, Feagaiga Fou  
 Lect. Rev. Harold Eveni, MABS, Feagaiga Fou  
 Lect. Rev. Faletoi Aofia, MABL, Feagaiga Fou  
 Lect. Rev. Simi Mauga, M.Div., Galuega Faafaifeau  
 Lect. Rev. Luaao Leasiolagi, M.Div., Oikumene  
 Lect. Rev. Palenapa Mataafa, MTh, Talafaasolopito  
 Lect. Rev. Fepuari Logoleo, MTS, Mataupu Silisili

O le agaga faafetai foi e tuuina atu i Faletua o alii Faiaoga mo la outou lagolagosua. Faafetai i lo outou faamalolosi i galuega na tofia ai outou i lena tausaga ua mavae atu. Viia le Atua.

Taiai D. Niuatoa  
 Lipine Falealii  
 Ese Esekia  
 Nunuiasolelei Laie  
 Falenaoti Lafitaga  
 Evelyn Eveni  
 Faioso Aofia  
 Aiga Mauga  
 Elisapeta Leasiolagi  
 Chaminade Mataafa  
 Mary Jane Logoleo

O le tausaga ua te’a, 2017, na valaauina ai le susuga ia Rev. Faafetai & Mafo’e Faavae mo le galuega i Pago Pago. Tausaga lenei, 2018, masina o Aperila, na tuua ai e le susuga i le alii Faifeau o Liusamoa & Dora Simolea le Laumua ona ua valaauina i le ekalesia i Futiga. Mālō le galulue.

\*\*\* IA MANUIA LE AOFIA \*\*\*